



Esaü vend sa primogeniture à Jacob. Isaac pour éviter la famine se retire en la ville de Gerar vers Abimelech:

IS A A C auoit de sa femme Rebecca deux fils, l'aîné desquels fut nommé Esaü, qu'il ayroit singulièrement, à cause qu'estant fort bien exercé à la chasse, il luy apportoit souuent de la venaison; & Rebecca sa femme ayroit Jacob le plus jeune, parce qu'il estoit plus paisible. Vn jour Esaü reuenant de la chasse fort affamé, trouua Jacob son frere dressant vn potage de lentilles bien appareillé, le pria instamment de luy en donner. Et Jacob dit: Volontiers je t'en donneray, moyennant que premierement tu me vendes & cedes ton droit de primogeniture. Ce que Esaü luy accorda, & confirma avec serment, disant: Puis que je meurs de faim, dequoy me seruira ce droit d'aînesse? Ainsi ayant mangé & beu, ne se soucia de sa primogeniture. Vn temps apres la famine estant grande au pais, Isaac voulant se retirer en Egypte, fut admonesté par reuelation du Seigneur, de s'arrestet en Gerar au pais d'Abimelech Roy des Palestins. Et estant en ce lieu, craignant que pour la beauré de sa femme les hommes du pais le tuassent, dit, que c'estoit sa sœur. Et le Roy Abimelech ayant apperceu que c'estoit sa femme, l'en tença, & fit deffendre à tous ses gens sur peine de mort, de toucher à l'honneur de Rebecca. En cette année-là, Isaac ensemença des terres, où il recueillit cent fois autant de bled qu'il en auoit semé, & ses troupeaux multiplierent grandement. Parquoy les habitans du pais luy portans grande enuie, remplirent de terre les puits que les seruiteurs d'Abraham auoient autresfois fait là autour.